

Na osnovu člana 73. stav 1. Zakona o izvršenju Budžeta Tuzlanskog kantona za 2026. godinu ("Službene novine Tuzlanskog kantona", br. 18/25, 3/26 i 8/26) i člana 23. stav 1. alineja 5. Zakona o ministarstvima i drugim organima uprave Tuzlanskog kantona ("Službene novine Tuzlanskog kantona", broj: 10/18 - prečišćen tekst i 5/24), ministar finansija donosi

**UPUTSTVO O POSTUPKU REFUNDACIJE UPLAĆENIH SUDSKIH I
ADMINISTRATIVNIH TAKSI ZA UPIS U NADLEŽNE REGISTRE I TROŠKOVA
NABAVKE FISKALNOG UREĐAJA**

I. OPĆE ODREDBE

Član 1.

(1) Ovim Uputstvom propisuje se postupak ostvarivanja prava na refundaciju:

a) uplaćenih sudskih taksi za upis novoosnovanih poslovnih subjekata u RegistarSKI odjel Općinskog suda u Tuzli;

b) uplaćenih administrativnih taksi za upis novoosnovanog osnovnog, dodatnog i dopunskog zanimanja u nadležni gradski ili općinski obrtni registar, upisnik putničkih agencija, upisnik turističkih vodiča, upisnik odobrenja za pružanje ostalih turističkih usluga fizičkih lica, registar trgovačkih radnji, registar ugostiteljskih radnji te registar izdatih odobrenja za obavljanje privatne prakse zdravstvenih radnika i zdravstvenih saradnika koje vodi Ministarstvo zdravstva Tuzlanskog kantona;

c) troškova nabavke fiskalnog uređaja u cilju fiskalizacije.

(2) Pravo na refundaciju iz stava (1) ovog člana ostvaruje se za poslovne subjekte osnovane u 2026. godini, pod uslovima i na način propisan ovim Uputstvom.

Član 2.

(1) Pod sudskim taksama u smislu ovog Uputstva podrazumijevaju se sudske takse utvrđene Zakonom o sudskim taksama - prečišćen tekst ("Službene novine Tuzlanskog kantona", br. 4/16 i 10/18) - Tarifa sudskih taksi - vrsta prihoda-722221, i to:

1. Tarifni broj 19. (takse za podneske)

a) Za prijavu u sudski registar novoosnovanih poslovnih subjekata

2. Tarifni broj 20. (taksa za upise u sudski registar)

a) Za rješenje o upisu osnivanja privrednog društva,

b) Za rješenje o upisu osnivanja dijelova privrednog društva,

c) Za rješenje o upisu osnivanja drugih pravnih osoba koje nisu navedene pod tačkama a) i b),

d) Za rješenje o upisu osobe ovlaštene za zastupanje novoosnovane pravne osobe,

e) Za rješenje o upisu prava vršenja spoljnotrgovinskog prometa novoosnovanih poslovnih subjekata,

f) Za rješenje o upisima koji nisu obuhvaćeni prethodnim tačkama.

(2) Pravo na refundaciju obuhvata i uplate izvršene u svrhu objavljivanja oglasa u Službenim novinama Federacije Bosne i Hercegovine za potrebe upisa osnivanja privrednog društva i/ili upisa prava obavljanja vanjskotrgovinskog poslovanja novoosnovanih poslovnih subjekata.

Član 3.

Pod administrativnim taksama u smislu ovog Uputstva podrazumijevaju se:

- a) kantonalne administrativne takse uplaćene na ime izdavanja rješenja o odobrenju za rad utvrđene Zakonom o kantonalnim administrativnim taksama - prečišćen tekst ("Službene novine Tuzlanskog kantona", br. 6/12, 15/13 i 10/18) - Tarifa kantonalnih administrativnih taksi -kantonalne administrativne takse - vrsta prihoda – 722121
- b) općinske administrativne takse u skladu sa propisima jedinica lokalne samouprave uplaćene na ime izdavanja odobrenja za rad - vrsta prihoda – 722131, 722135 i 722449.

Član 4.

Pravo na refundaciju uplaćenih sudskih i administrativnih taksi iz člana 1. ovog Uputstva iz sredstava Budžeta Tuzlanskog kantona imaju uplatitelji sudskih i/ili administrativnih taksi pod uslovom da nadležna jedinica lokalne samouprave na području Tuzlanskog kantona ne vrši refundaciju tih taksi ili ne provodi postupak oslobađanja od plaćanja istih i da u prethodnih 5 (pet) godina nisu ostvarili pravo na refundaciju ili oslobađanje od plaćanja sudskih i/ili administrativnih taksi iz člana 1. ovog Uputstva.

II. UTVRĐIVANJE PRAVA NA REFUNDACIJU SUDSKIH TAKSI, ADMINISTRATIVNIH TAKSI I NOVČANIH SREDSTAVA NA IME NABAVKE FISKALNOG UREĐAJA

Član 5.

(1) Pod uplaćenim sudskim i administrativnim taksama, u smislu ovog Uputstva, podrazumijeva se uplata koja je evidentirana na Jedinstvenom računu trezora Tuzlanskog kantona (JRT) ili računu jedinice lokalne samouprave Tuzlanskog kantona u ovisnosti od pripadnosti takse, na način propisan važećim Pravilnikom o načinu uplate, pripadnosti i raspodjele javnih prihoda u Federaciji Bosne i Hercegovine i drugim važećim zakonskim propisima i aktima kojima se regulira način uplate sudskih i administrativnih taksi.

(2) Pod uplatiteljem, u smislu ovog Uputstva, podrazumijeva se pravno lice ili fizičko lice, a koje je izvršilo uplatu sudske ili administrativne takse na JRT ili račun jedinice lokalne samouprave ili poslovni subjekt koji je izvršio uplatu novčanih sredstava na ime nabavke fiskalnog uređaja ovlaštenom distributeru.

Član 6.

Fiskalnim uređajem, u smislu ovog Uputstva, smatra se fiskalni uređaj u smislu Zakona o fiskalnim sistemima ("Službene novine Federacije BiH", broj 81/09).

Član 7.

(1) Pravo na refundaciju uplaćenih novčanih sredstava na ime nabavke fiskalnog uređaja imaju poslovni subjekti iz člana 1. ovog Uputstva koji u toku 2026. godine kumulativno ispunjavaju sljedeće uslove:

1. da su prvi put osnovani u 2026. godini
2. da prvi put u 2026. godini provode postupak fiskalizacije za taj poslovni subjekat

3. da osnivač/vlasnik poslovnog subjekta u prethodnih 5 (pet) godina nije ostvario pravo na refundaciju uplaćenih novčanih sredstava na ime nabavke fiskalnog uređaja.

(2) Refundacija novčanih sredstava na ime nabavke fiskalnog uređaja može se ostvariti samo jednom.

(3) Pod uplaćenim novčanim sredstvima na ime nabavke fiskalnog uređaja podrazumijevaju se uplate izvršene isključivo bezgotovinskim načinom plaćanja od strane poslovnog subjekta koji je osnovan u toku 2026. godine ovlaštenom proizvođaču/zastupniku ili ovlaštenom distributeru na ime nabavke fiskalnog uređaja, a u skladu sa Zakonom o fiskalnim sistemima ("Službene novine F BiH" broj: 81/09).

(4) Pod uplaćenim novčanim sredstvima na ime nabavke fiskalnog uređaja ne podrazumijevaju se uplate izvršene gotovinskim plaćanjem i iste ne podliježu odobravanju prava na refundaciju novčanih sredstava na ime nabavke fiskalnog uređaja.

(5) Pod uplaćenim novčanim sredstvima na ime nabavke fiskalnog uređaja ne podrazumijevaju se uplate na ime usluga inicijalne fiskalizacije uređaja i iste ne podliježu odobravanju prava na refundaciju novčanih sredstava.

Član 8.

Refundacija troškova nabavke fiskalnog uređaja može se odobriti u maksimalnom iznosu do 800,00 KM sa uključenim PDV-om.

Član 9.

Pravo na refundaciju uplaćenih sudskih taksi, administrativnih taksi kao i novčanih sredstava na ime nabavke fiskalnog uređaja može ostvariti isti osnivač ili vlasnik obrta samo za jedan novoosnovan poslovni subjekt u toku jedne fiskalne godine.

Pravo na refundaciju uplaćenih sudskih taksi, administrativnih taksi kao i novčanih sredstava na ime nabavke fiskalnog uređaja može ostvariti osnivač ili vlasnik poslovnog subjekta iz člana 1. Uputstva koji u prethodnih 5 (pet) godina nije ostvario pravo na refundaciju uplaćenih sudskih taksi, administrativnih taksi ili oslobađanje od obaveze plaćanja sudskih taksi, administrativnih taksi kao i novčanih sredstava na ime nabavke fiskalnog uređaja.

Član 10.

- (1) Postupak ostvarivanja prava na refundaciju pokreće se podnošenjem pisanog zahtjeva Ministarstvu finansija Tuzlanskog kantona (u daljem tekstu: Ministarstvo).
- (2) Zahtjev se podnosi putem pisarnice Ureda za zajedničke poslove kantonalnih organa.
- (3) Zahtjev obavezno sadrži osnovne podatke podnosioca zahtjeva i to: prezime, ime, adresa, JMBG i kontakt telefon za fizička lica, odnosno naziv i sjedište firme, ID broj i kontakt telefon za pravna lica.

(4) Podnošenjem zahtjeva podnosilac daje saglasnost za obradu svojih ličnih podataka u svrhu vođenja postupka, u skladu sa Zakonom o zaštiti ličnih podataka BiH.

Član 11.

(1) Uz zahtjev iz člana 10. ovog Uputstva za refundaciju sudskih taksi i/ili administrativnih taksi prilaže se:

1. dokaz o upisu poslovnog subjekta u odgovarajući registar – original ili ovjerena kopija
2. Uvjerenje o poreskoj registraciji – original ili ovjerena kopija
3. dokaz o izvršenoj uplati takse sa jasno naznačenim podacima o uplatitelju novčanih sredstava, svrhom uplate i vrstom prihoda i šifre općine (nalog za uplatu ili ovjerena kopija naloga za uplatu, izvod sa žiro računa uplatioca i drugi dokazi na temelju kojih se mogu utvrditi podaci i svrha uplate) – original ili ovjerena kopija
4. izjava, ovjerena kod nadležnog organa (notar ili nadležna gradska/općinska služba), uplatioca sudskih taksi ili administrativnih taksi iz člana 2. i 3. Uputstva da nije ostvario pravo na oslobođenje od plaćanja sudskih taksi ili administrativnih taksi ili refundaciju uplaćenih taksi od strane jedinica lokalne samouprave na području Tuzlanskog kantona na ime osnivanja poslovnog subjekta u toku tekuće fiskalne godine i da u prethodnih 5 (pet) godina nije ostvario pravo na oslobođenje od plaćanja sudskih taksi ili administrativnih taksi ili refundaciju uplaćenih taksi od strane jedinica lokalne samouprave na području Tuzlanskog kantona na ime osnivanja poslovnog subjekta
5. kopija važeće lične karte za fizičko lice
6. kopija broja žiro računa novoosnovanog poslovnog subjekta
7. eventualno ostali dokazi o izvršenim uplatama.

(2) U slučaju da poslovni subjekt ima više osnivača/vlasnika, svaki osnivač/vlasnik dostavlja izjavu iz stava (1) tačka 4. Uputstva i kopiju lične karte iz stava (1) tačka 5. Uputstva.

(3) Uz zahtjev iz člana 10. ovog Uputstva za refundaciju novčanih sredstava na ime nabavke fiskalnog uređaja prilaže se:

1. dokaz o upisu poslovnog subjekta u odgovarajući registar – original ili ovjerena kopija
2. Uvjerenje o poreskoj registraciji – original ili ovjerena kopija
3. Rješenje o fiskalizaciji fiskalnog sistema u 2026. godini – original ili ovjerena kopija
4. dokaz o izvršenoj bezgotovinskoj uplati novčanih sredstava na ime nabavke fiskalnog uređaja i to kumulativno: predračun/profaktura, fiskalni račun, faktura, izvod sa žiro računa novoosnovanog poslovnog subjekta na ime nabavke fiskalnog uređaja – original ili ovjerena kopija
5. kopija broja žiro računa novoosnovanog poslovnog subjekta
6. izjava, ovjerena kod nadležnog organa (notar ili nadležna gradska/općinska služba), osnivača novoosnovanog poslovnog subjekta odnosno vlasnika obrta da prvi puta podnosi zahtjev za refundaciju novčanih sredstava na ime nabavke fiskalnog uređaja u toku tekuće fiskalne godine i da nije ostvario pravo na refundaciju novčanih sredstava na ime nabavke fiskalnog uređaja iz člana 1. Uputstva o postupku refundacije uplaćenih sudskih i administrativnih taksi za upis u nadležne registre i troškova nabavke fiskalnog uređaja u toku prethodnih 5 (pet) godina
7. eventualno ostali dokazi o izvršenim uplatama.

(4) U slučaju da poslovni subjekt ima više osnivača/vlasnika, svaki osnivač/vlasnik dostavlja izjavu iz stava (3) tačka 6. Uputstva.

Član 12.

- (1) Ako zahtjev nije potpun ili uredan, Ministarstvo će pozvati podnosioca da u ostavljenom roku otkloni utvrđene nedostatke.
- (2) Ako podnosilac zahtjeva ne postupi po zahtjevu Ministarstva u ostavljenom roku, Ministarstvo će zahtjev odbiti rješenjem.
- (3) Neblagovremen zahtjev Ministarstvo će odbiti rješenjem.

III. ODOBRAVANJE REFUNDACIJE SUDSKIH TAKSI, ADMINISTRATIVNIH TAKSI I NOVČANIH SREDSTAVA NA IME NABAVKE FISKALNOG UREĐAJA

Član 13.

- (1) Ministarstvo, na osnovu dokumentacije priložene uz zahtjev podnosioca zahtjeva, donosi rješenje o utvrđivanju prava na refundaciju uplaćene sudske takse, administrativne takse ili uplaćenih novčanih sredstava na ime nabavke fiskalnog uređaja.
- (2) Ako ocijeni da je to potrebno radi pravilnog utvrđivanja činjeničnog stanja, Ministarstvo može od podnosioca zahtjeva koji je dostavio propisanu dokumentaciju odnosno od nadležnog organa zatražiti da dostavi dodatne dokaze ili drugu dokumentaciju od značaja za odlučivanje po zahtjevu.
- (3) Zahtjev za refundaciju uplaćene sudske takse, administrativne takse ili novčanih sredstava na ime nabavke fiskalnog uređaja uplaćenih u 2026. godini može se podnijeti najkasnije do 31.12.2026. godine.

(4) Dispozitiv rješenja iz stava (1) ovog člana sadrži:

- podatke o podnosiocu zahtjeva (prezime i ime i adresu za fizička lica, odnosno naziv i sjedište pravnog lica)
- identifikacijski broj podnosioca zahtjeva za pravna lica ili jedinstveni matični broj građanina
- utvrđeni iznos sredstava koji se refundira po osnovu uplaćene sudske takse, administrativne takse ili novčanih sredstava uplaćenih na ime nabavke fiskalnog uređaja;
- šifru prihoda i općine za refundaciju uplaćene sudske takse i/ili administrativne takse;
- datum uplate sudske takse, administrativne takse ili datum uplate novčanih sredstava na ime nabavke fiskalnog uređaja;
- broj transakcijskog računa i naziv banke kod koje je račun otvoren za lice kojem se vrši refundacija.

Član 14.

- (1) Refundacija uplaćene sudske takse, administrativne takse ili uplaćenih novčanih sredstava na ime nabavke fiskalnog uređaja se vrši prenosom sredstava na transakcijski račun podnosioca zahtjeva, na osnovu naloga za prenos sredstava.

(2) Nalog za prenos popunjava se na način propisan važećim Pravilnikom o načinu uplate javnih prihoda budžeta i vanbudžetskih fondova na teritoriji Federacije Bosne i Hercegovine.

(3) Nalozi za refundaciju mogu se ispostavljati djelimično u skladu sa tekućim prilivom na JRT.

IV. PRIJELAZNE I ZAVRŠNE ODREDBE

Član 15.

Obrasci izjava iz člana 11. stav (1) i (3) Uputstva nalaze se u prilogu ovog Uputstva i čine njegov sastavni dio.

Član 16.

(1) Izuzetno od odredbi člana 13. stav (3) Uputstva, za poslovne subjekte iz člana 1. ovog Uputstva koji izvrše upis u Registarskom odjeljenju Općinskog suda u Tuzli ili u nadležni registar u periodu od 15.12.2026.-31.12.2026. godine, rok za podnošenje zahtjeva za refundaciju uplaćenih sudskih i administrativnih taksi kao i novčanih sredstava na ime nabavke fiskalnog uređaja ističe 31.01.2027. godine.

(2) Refundacija novčanih sredstava iz stava (1) ovog člana će biti izvršena na teret budžeta Tuzlanskog kantona za 2027. godinu.

Član 17.

Protiv rješenja Ministarstva iz člana 12. i člana 13. Uputstva, podnosilac zahtjeva može izjaviti žalbu Komisiji za drugostepeno rješavanje Vlade Tuzlanskog kantona.

Član 18.

- (1) Ovo Uputstvo se primjenjuje za 2026. godinu, osim u slučaju izmjene, dopune ili donošenja novog propisa o fiskalizaciji u toku 2026. godine, ukoliko takvi propisi utiču na nabavku fiskalnih uređaja.
- (2) U slučaju iz stava (1) ovog člana, odredbe ovog Uputstva koje se odnose na refundaciju troškova nabavke fiskalnog uređaja neće se primjenjivati od dana stupanja na snagu propisa kojim se to pitanje drugačije uredi.
- (3) Zahtjevi za refundaciju novčanih sredstava na ime nabavke fiskalnog uređaja podnijeti prije stupanja na snagu propisa iz stava (1) ovog člana, završiti će se po odredbama ovog Uputstva.

Član 19.

Ovo Uputstvo stupa na snagu danom donošenja i objavit će se u "Službenim novinama Tuzlanskog kantona".

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
MINISTARSTVO FINANSIJA

Broj: 07/1-11-22238/26
Tuzla, 21.07.2026. godine



OBRAZAC 1: IZJAVA UPLATIOCA SUDSKE TAKSE ILI ADMINISTRATIVNE TAKSE

IZJAVA

Ja, _____ (ime i prezime), _____ (JMB),
osnivač/vlasnik poslovnog subjekta _____ (naziv poslovnog
subjekta) dobrovoljno i pod punom moralnom, materijalnom i krivičnom odgovornošću,
izjavljujem da nisam ostvario pravo na oslobođenje od obaveze plaćanja sudske takse ili
administrativne takse na ime osnivanja poslovnog subjekta niti pravo na refundaciju uplaćene
sudske takse ili administrativne takse od strane jedinica lokalne samouprave na području
Tuzlanskog kantona na ime osnivanja poslovnog subjekta u toku tekuće 2026. godine.

Nadalje, dobrovoljno i pod punom moralnom, materijalnom i krivičnom odgovornošću,
izjavljujem da u prethodnih 5 (pet) godina kao osnivač/vlasnik poslovnog subjekta na području
Tuzlanskog kantona nisam ostvario pravo na oslobođenje od obaveze plaćanja sudske takse ili
administrativne takse na ime osnivanja poslovnog subjekta niti pravo na refundaciju uplaćene
sudske takse ili administrativne takse od strane jedinica lokalne samouprave na području
Tuzlanskog kantona na ime osnivanja poslovnog subjekta.

U _____, dana _____, godine
(mjesto) (datum)

POTPIS DAVAOCA IZJAVE

Potpis i pečat nadležnog organa za ovjeru:

NAPOMENA: Izjavu potpisuje davalac izjave i izjavu ovjerava u nadležnoj
gradskoj/općinskoj službi ili u nadležnom notarskom uredu.

OBRAZAC 2: IZJAVA OSNIVAČA/VLASNIKA POSLOVNOG SUBJEKTA ZA
REFUNDACIJU NOVČANIH SREDSTAVA NA IME NABAVKE FISKALNOG UREĐAJA

IZJAVA

Ja, _____ (ime i prezime), _____ (JMB),
osnivač/vlasnik poslovnog subjekta _____ (naziv poslovnog
subjekta) dobrovoljno i pod punom moralnom, materijalnom i krivičnom odgovornošću,
izjavljujem da prvi put podnosim zahtjev za refundaciju novčanih sredstava na ime nabavke
fiskalnog uređaja u toku 2026. godine.

Nadalje, dobrovoljno i pod punom moralnom, materijalnom i krivičnom odgovornošću,
izjavljujem da u prethodnih 5 (pet) godina kao osnivač/vlasnik poslovnog subjekta na području
Tuzlanskog kantona nisam ostvario pravo na refundaciju novčanih sredstava na ime nabavke
fiskalnog uređaja iz člana 1. Uputstva o postupku refundacije uplaćenih sudskih i
administrativnih taksi za upis u nadležne registre i troškova nabavke fiskalnog uređaja.

U _____, dana _____ godine
(mjesto) (datum)

POTPIS DAVAOCA IZJAVE

Potpis i pečat nadležnog organa za ovjeru:

NAPOMENA: Izjavu potpisuje davalac izjave i izjavu ovjerava u nadležnoj
gradskoj/općinskoj službi ili u nadležnom notarskom uredu.